

肉

卷

所

藏

江蘇古籍出版社

賢良進卷
註陸宣公奏議



註陸宣公奏議

江蘇古籍出版社

四庫未收書提要

擘經室外集卷五

唐陸宣公奏議註十五卷提要

唐陸贄撰贄有翰苑集四庫全書已著錄是編惟有奏議宋卽煜注煜事蹟無考卷首載經進奏議表銜題迪功卽紹興府嵎縣主簿煜又註東坡文集事略題銜與此相同此編所註惟採經史為多無泛搜博引之失不特選擇得當節錄亦多精審使讀者易見端倪茲從元至正甲午翠巖精舍重刊宋本影寫亦讀史者所不廢也

註陸宣公奏議序

陸宣公文集序

權德輿

嘗讀賈誼書觀其經制人文鋪陳帝業術亦至矣待之宣室
恨得後時遇亦深矣然竟不能達四聰而盡其善排羣議而
試厥謀道之難行亦已久矣東陽絳灌何代無之嘻一薰一
蕕善齊不能同其器方鑿圓柄良工無以措巧心所以理世
少而亂日多大雅衰而正聲寢漢道未融旣失之於賈傅吾
唐不幸復擯棄於陸公公諱贄字敬輿吳郡蘇人漂陽令侃
之子年十八登進士第應博學宏辭科授鄭州尉非其好也
省母歸壽春刺史張鎰以有名於時一獲晤言大加賞識暨
別鎰以泉貨數萬贄曰願以此奉太夫人一日之膳公悉辭
之領新茶一串而已是歲以書判拔萃調渭南主簿

本傳作
調渭南尉

御史府以監察換之德宗皇帝春官時知名召對翰林即日
爲學士由祠部員外轉考功郎中朱泚之亂從幸奉天時車
駕播遷詔書旁午公灑翰即成不復起草初若不經思慮及
成而奏無不曲盡事情中於機會倉卒填委同職者無不拱
手嘆伏不能復有所助嘗從容奏曰此時詔書陛下宜痛自
引過以感人心昔禹湯以罪己勃興楚昭以善言復國陛下
誠能不愾改過以言謝天下俾臣草辭無諱庶幾羣盜革心
上從之故行在詔書始下雖武人悍卒無不揮涕激發議者
以德宗克平寇亂不惟神武之功爪牙宣力蓋以資文德腹
心之助焉及還京師李抱真來朝奏曰陛下出山南時山東
士卒聞書詔之辭無不感泣思奮臣節臣知賊不足平也公
自行在帶本職拜諫議大夫中書舍人精敏小心未嘗有過

艱難扈從行在輒隨啓沃謀猷時所親信有時譏語不以公卿指名但呼陸九而已初幸梁洋棧道危狹從官前後相失上夜次山館召公不至泣然號於禁旅曰得陸勢者賞千金頃之公至太子親王皆賀初公旣職內署母韋氏尚在吳中上遣中使迎致京師道路置驛文士榮之下韋夫人憂去職持喪於洛遣人護漂陽之柩附葬河南一遣中使監護其事四方賻遺數百萬公一無所取素與蜀帥韋南康布衣友善韋令每月置遺公奏而受之服闋復內職權知兵部侍郎覲見之日天子爲之興改容叙弔優禮如此內外屬望旦夕俟其輔政爲竇叅忌嫉故緩之眞拜兵部侍郎知貢舉得人之盛公議稱之貞元八年拜中書侍郎平章事公以少年入侍內殿特蒙知遇不可與衆浮沉苟且自愛事有不可必諍之

上察物太精躬臨庶政失其大體動與公違姦諛從而間之
屢至不悅親友或規之公曰吾上不負天子下不負吾所學
不恤其他公精於吏事斟酌剖決不爽錙銖其經綸制度具
在德宗實錄及實叅納劉士寧之賂爲李巽所發得罪左遷
橫議者以公與叅素不協歸罷相之議於公戶部侍郎判度
支裴延齡以姦回得幸害時蠹政物議莫敢指言公獨以身
當之屢言不可翰林學士吳通元忌公先達每切中傷陰結
延齡互言公短宰相趙憬公之引拔昇爲同列以公排邪守
正心復異之羣邪沮謀直道不勝十年退公爲賓客罷政事
明年夏旱芻糧不給軍校訴於上延齡奏曰此皆陸贄輩怨
望鼓扇軍人也貶公忠州別駕上怒不可測賴陽城張萬福
救之獲免蜀帥韋令抗表請以贄代已歲賂資糧公在南賓

閉門却掃郡人稀識其面復避諺不著書惟考校醫方撰集
驗方五十卷行於世江浹十稔永貞初與鄭餘慶陽城同徵
還公已薨歿時年五十二公之秉筆內署也推古揚今雄文
藻思敷之爲文誥伸之爲典謨俾標校向風懦夫增氣則有
制誥集一十卷覽公之作則知公之爲文也潤色之餘論思
獻納軍國利害巨細必陳則有奏章七卷覽公之奏則知公
之爲臣也其在相位也推賢與能舉直錯枉將幹璿衡而揭
日月清氛沴而平泰階敷其道也與伊說爭衡考其文也與
典謨接軫則有中書奏議七卷覽公之奏議則知公之事君
也古人以士之遇也其要有四焉才位時命也仲尼有才而
無位其道不行賈生有時而無命終於一慟惟公才不謂不
長位不謂不達逢時而不盡其道非命歟裴氏之子焉能使

公不過哉說者又以房魏姚宋逢時過主克致清平陸君亦
獲幸時君而不能與房魏爭列蓋道未至也應之曰道雖在
我宏之在人蜚蝗竟天農稷不能善稼奔車覆轍卽軻亦廢
規行若使四君與公易時而相則一否一臧未可知也而致
君不及貞觀開元者蓋時不幸也豈公不幸哉以爲其道未
至不亦誣乎公之文集有詩文賦集表狀爲別集十五卷其
關於時政昭昭然與金石不朽者惟制誥奏議乎雖已流行
多謬編次今以類相從冠於編首兼畧書其官氏景行以爲
序引俾後之君子覽公制作効之爲文爲臣事君之道不其
偉歟

經進唐陸宣公奏議表

迪功郎紹興府嵊縣主簿臣煜言臣所註唐陸宣公贄奏議十五卷繕寫成秩謹詣登聞檢院投進者不負所學期納忠於一時據直而言果爲法於後世可謂皆本仁義非徒曲盡事情雖殫見聞奚探涯涘臣誠惶誠懼頓首頓首竊以言有逆順道存是非大臣知憂國而愛君有懷必吐小人喜乘時而射利流弊無窮顧忠邪之跡易明豈聽納之際難辨倘人主用心或好順而惡逆則羣下進說必以是而爲非此忠言多致於不行而吾道每憂其難合惟陸贄蘊經濟之畧值德宗當艱難之初勢雖危疑動必剴切無片言不合於理靡一事或失於機策之熟見之明若燭照而數計言之重辭之復冀陽長而陰消惜乎枘鑿不侔冰炭難入方其多難姑屈意

以聽從逮至小康遽追仇而擯棄主眷則異臣心益堅第知
卹天下之安危豈復計吾身之利害論諫數百雖晦蝕於建
中正元之間勸講再三廼發揮於元祐淳熙之盛幸聖賢之
默契宜今古之同符恭惟

至尊壽皇聖帝性本誠明學全終始既多識於前言往行道
積厥躬猶不遺於片善寸長近取諸贄折衷一語鼓動四方
斯蓋恭遇

皇帝陛下法乾行健繼離嚮明治已至不忘於兢業德雖盛
尤樂於討論粵自潛藩屢披奏牘惟精惟一固得於問安視
膳之餘嘉謀嘉猷復取於攷古驗今之次臣自慚魯鈍有愧
師承妄加採撫之工僭釋精英之論庶期觀覽易究端倪畫
蛇寧免於支離坐井曷窺於小大徒傾口耳何補涓埃伏望

皇帝陛下置座之隅以古爲鑑廓日月之明斷制庶政恢江海之量容納衆言監爪果而賞不妄加念兵食而將不輕用斯皆治道之急務固亦聖主所優爲使毫釐有濟於斯民則竹帛愈光於前哲具奏議并目錄共十一冊謹隨表上進以聞臣冒犯天威下情無任激切屏營之至臣誠惶誠懼頓首頓首謹言

進讀奏議劄子

元祐八年五月七日蘇軾同呂希哲吳安詩豐稷趙彥若范祖禹顧臨劄子奏臣等猥以空疎備員講讀恭惟

聖明天縱學問日新臣等才有限而道無窮心欲言而口不逮以此自愧莫知所爲竊爲人臣之納忠譬如醫者之用藥藥雖進於醫手方多傳於古人若已經効於世間不必皆從於己出伏見唐宰相陸贄才本王佐學爲帝師論深切於事情言不離於道德智如子房而文則過辨如賈誼而術不踈上以格君心之非下以通天下之志但其不幸仕不遇時德宗以苛刻爲能而贄諫之以忠厚德宗以猜疑爲術而贄勸之以推誠德宗好用兵而贄以消兵爲先德宗好聚財而贄以散財爲急至於用人聽言之法治邊馭將之方罪己以收

人心改過以應天道去小人以除民患惜名器以待有功如此之流未易悉數可謂進苦口之藥石鍼害身之膏肓使德宗盡用其言則貞觀可得而復臣等每退自

西閣即私相告言以

陛下聖明必喜贊議論但使聖賢之相契即如臣主之同時昔馮唐論頗牧之賢則漢文爲之太息魏相條晁董之對則孝宣以致中興若

陛下能自得師莫若近取諸贊夫六經三史諸子百家非無可觀皆足爲治但聖言幽遠未學支離譬如山海之崇深難以一二而推擇如贊之論開卷了然聚古今之精英實治亂之龜鑑臣等欲取其奏議稍加校正繕寫進呈願

陛下置之坐隅如見贊面反復熟讀如與贊言必能發聖性

之高明成治功於歲月臣等不勝區區之意取進止

註唐陸宣公奏議目錄

卷之一

論關中事宜狀

論兩河及淮西利害狀

卷之二

論叙遷幸之由狀

奉天論奏當今所切務狀

奉天論前所答奏未施行狀

卷之三

奉天論尊號加字狀

重論尊號狀

奉天論赦書事條狀

奉天論擬與翰林學士改轉狀

奉天請數對羣臣兼許令論事狀

卷之四

奉天請罷瓊林大盈二庫狀

奉天論解蕭復狀

奉天薦袁高等狀

奉天論李晟所管兵馬狀

奉天奏李建徽楊惠元兩節度兵馬狀

駕幸梁州論進獻瓜果人擬官狀

又論進瓜果人擬官狀

興元論解姜公輔狀

卷之五